

Localidade: Mondoñedo (Lugo).

Alcume do equipo: Quescastañas.

Nome da campaña: ¡Actúa xa!

3º premio dotado con 300 euros e diploma: deserto.

## CONSELLERÍA DE EDUCACIÓN E ORDENACIÓN UNIVERSITARIA

*Decreto 76/2007, do 12 de abril, polo que se crea o colexio de educación infantil e primaria de Monterroso (Lugo).*

O Estatuto de autonomía de Galicia no seu artigo 31 e o Decreto 585/2005, do 29 de decembro, polo que se establece a estrutura orgánica da Consellería de Educación e Ordenación Universitaria, establece a competencia desta en materia de planificación, regulación e administración do ensino regrado en toda a súa extensión.

Tendo en conta o disposto na Lei orgánica 2/2006, do 3 de maio, de educación, e no Real decreto 1537/2003, do 5 de decembro, polo que se establecen os requisitos mínimos dos centros que impartan ensinanzas escolares de réxime xeral, e vista a necesidade de racionalizar a oferta educativa do concello de Monterroso en función da previsión de escolarización.

De conformidade co exposto, por proposta da conselleira de Educación e Ordenación Universitaria, no exercicio da facultade outorgada polo artigo 34 da Lei 1/1983, do 22 de febreiro, reguladora da Xunta e do seu presidente, modificada pola Lei 11/1988, do 20 de outubro, logo da deliberación do Consello da Xunta de Galicia na súa reunión do día doce de abril de dous mil sete,

### DISPOÑO:

#### Artigo 1º

Créase o colexio de educación infantil e primaria de Monterroso (código 27020801) con capacidade para seis unidades de educación infantil e 12 unidades de educación primaria.

#### Artigo 2º

Intégranse neste centro o colexio de educación infantil e primaria de Monterroso nº 1 (código 27007430) e o colexio de educación infantil e primaria de Monterroso nº 2 (código 27016121), que se suprimen como tales.

#### Artigo 3º

Ao profesorado afectado seralle de aplicación o establecido no Decreto 140/2006, do 31 de agosto, polo que se determinan os criterios de perda de destino definitivo polas funcionarias e funcionarios docentes que prestan servizos nos centros educativos que imparten ensinanzas distintas das universitarias e o cómputo de antigüidade no centro en función das causas de acceso a el.

### Disposición derradeira

Primeira.-Autorízase a Consellería de Educación e Ordenación Universitaria para adoptar as medidas necesarias para o cumprimento do disposto neste decreto.

Segunda.-Este decreto entrará en vigor o 1 de xullo de 2007.

Santiago de Compostela, doce de abril de dous mil sete.

Emilio Pérez Touriño  
Presidente

Laura Sánchez Piñón  
Conselleira de Educación e Ordenación Universitaria

*Orde do 16 de abril de 2007 pola que se fai pública a resolución do concurso público de axudas complementarias do programa de acción da Unión Europea de mobilidade de estudantes Sócrates-Erasmus e Suíza correspondente ao curso académico 2006-2007 convocadas pola Orde do 4 de decembro de 2006 (Diario Oficial de Galicia do 13 de decembro).*

Pola Orde do 4 de decembro de 2006 (DOG do 13 de decembro), convocáronse axudas complementarias do programa de acción da Unión Europea de mobilidade de estudantes Sócrates-Erasmus e Suíza, correspondentes ao curso académico 2006-2007, e aprobáronse as bases desta convocatoria.

De acordo co establecido no artigo 7º desta convocatoria, desde o día 12 ao 22 de febreiro de 2007 expuxéronse as listas provisionais de solicitudes admitidas e excluídas por documentación, podendo durante ese mesmo prazo os interesados formular as reclamacións para emendar erros e faltas de documentos ante a Dirección Xeral de Ordenación e Calidade do Sistema Universitario de Galicia.

Rematado este prazo, as solicitudes admitidas foron estudadas pola comisión avaliadora nomeada na propia orde de convocatoria.

En consecuencia, de acordo co establecido no artigo 10 das bases da convocatoria, e atendendo ao informe-proposta elevado pola citada comisión avaliadora a través da Dirección Xeral de Ordenación e Calidade do Sistema Universitario de Galicia, esta consellería

### RESOLVE:

#### Artigo 1º

Concederlles axudas complementarias do programa de acción da Unión Europea de mobilidade de estudantes Sócrates-Erasmus e Suíza ao alumnado universitario que se relaciona no anexo I da presente orde e pola contía que se especifica.